



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICO-CHIRURGICA

QUOD LIBETARIIS DISPUTATIONIBUS  
*manè discutienda in Scholis Medicorum, die Jovis quarto mensis  
Aprilis, Anno Domini M. DCC. XLVIII.*

M. JULIANO BUSSON, Doctore Medico, Præside.

*An absque membrana tympani apertura topica injici in concham possint?*

I.



URIS interna à meatu auditorio dissociatur inter-  
gerino pariete, qui membrana tympani appellatur.  
Hæc pellicula est tenuis, pellucida, admodum  
tensa, non tamen plana; etenim ex parte meatūs  
auditorii figuram habet cavam, convexam autem à  
parte ossis petrosi, ita ut ex basi rotundâ in acumen desinat in

A

103  
2  
tympano: variis instruitur lamellis sibi invicem appositis & ad-  
hærentibus, quarum externa epidermidis, cutisque, interna  
periosteï succingentis tympanum productio esse videtur. Illius  
est munus, ut motus sonoros ad interiora transmittat ossicula,  
malleum scilicet, incudem & stapedem, necnon impediat quo-  
minùs aër externus, sordes, pulveres, insecta & alia hujusmo-  
di in tympanum ingrediantur. Hinc patet quanti referat mem-  
branam tympani, si fieri possit, illibatam conservare, quoties-  
cumque pus aut humoris decubitus concham internam opplet.

## I I.

**S**I pus aut humor malignæ indolis diutius in tympano im-  
moraretur, ad operationem confugiendum esset: membra-  
na tympani instrumento idoneo incidenda. Alioquin stagnan-  
tis ichoris acrimonia posset ipsum & ossa vicina erodere, cor-  
rumpere, cellulas processûs mastoïdis & labyrinthi parietes ado-  
riri, undè auri labefactatæ eriperetur auditûs facultas, re-  
lictâ carie, quæ, sensum serpendo, tandem mortem inferret im-  
provisam. Satiùs est igitur in quibusdam casibus membranæ  
tympani minùs parcere. Illâ enim perforatâ, humoribus tympani  
inquinis ampla via referabitur, locus dabitur in illud inji-  
ciendi liquores deterivos syringis ope. Fateamur oportet illa  
præcepta dictu quàm persuasû faciliora esse. Decantata opera-  
tionis necessitas & tempus definiri in præsentibus aurium mor-  
bis vix queunt, cùm in latebris ossis malum incarceretur. Sa-  
pientis & periti est Medici morbi causas, symptomata, effe-  
ctus, examinare, componere, ab ægro sciscitari an præter  
surditatem, sensum gravitatis tensionisque &c. in tympano  
sentiat; nam, si istud humoribus turgeat, ipsius membra-  
na retropellitur, tenditur, tensioque ab ægrotante persentitur.  
Sed etiam si certa foret indicatio abcessûs in auris cavo inte-  
riore delitescens evacuandi, non illicò ad lanceolam prope-  
randum. Alia sunt auxilia priùs tentanda.

## I I I.

**N**ATURALEM sequi viam debemus per quam è tym-  
pano humor inclusus eliminari & concha detergi potest.  
Hæc via tuba Eustachiana est: quo nomine insignitur canalis

seu meatus partim osseus, partim cartilagineus, cujus osculum alterum patet in tympano, alterum versus nares posticas; ibi internum tubæ latus margine semilunari cartilagineo terminatur. Per tubam Eustachianam aër externus, qui naribus & ore hauritur, penetrare in concham internam, manere, rarefieri, exire, renovari potest: radii sonori naribus & ore admissi huc intrant &, adulterato meatu auditorio, auditum expediunt. Quoniam autem ista loca vasculari membranâ induta sunt, molliter laxata, lubricata & munda (quandiu cuncta bellè se habent) conservantur. Verisimile est per hunc canaliculum pus aut peregrinos humores in tympano inclusos posse in fauces stillare, si artis auxilio juventur, nempe topicis emollientibus simul & deterfivis auri admotis. Ad præstantiorem medendi rationem, quæ his jungi debet, transvolemus.

# I V.

**U**T efficacius fiat conchæ internæ deterfio, vaporis medicati in illam sic intrudi per meatum Eustachianum queunt. Ager vaporem aquæ mellitæ aut aliûs convenientis ore excipiat magno haustu: illico spiritu cohibito narium pinnas digitis ritè premat: labium labio adducat, ita ut aëri intercludatur exitus: nunc musculos expiratorios contrahendo aërem è pulmonibus in oris antrum fortiter propellat: aër undique in ore pressus quâ data porta ruit, nempe per tubam Eustachianam in tympanum; illud opplet & ejus membranam retropellit: sic vapor medicamentosus cum aëre in concham truditur: sæpè repetitis vaporis haustibus & expiratione artificiosâ, humor noxius, quo tympanum infarcitur, dilui potest & ad exeundum per tubam magis expeditus reddi. Aër, qui è pulmonibus vi quâdam intrusus fuit in tympanum, naturali quo pollet elatere in fauces resilit, nec potest remeando non auferre mobiliore humorum in tympano stabulantium particulas. Huc accedit quod aër externus qui toto atmosphæræ pondere incumbit in exteriorem membranæ tympani superficiem, ut primùm os post nifum expiratorium aperitur, viribus præpolleat, illam agar, repellat, in priorem statum restituat, ac proinde vim augeat aëris & vaporis medicamentosi exitum è tympano in fauces molientium.

**O**BJICIESNE hinc nimis periculofam effe membranæ tympani incisionem, illinc valdè nocivam aëris & vaporis per tubam Eustachianam in tympanum intromissionem, quæ sine violentiâ quâdam absolvi nequit? Num autem quicumque aurium abcessibus laborant infelici suæ forti (ut fieri solet) permittendi? An præstat membranæ tympani suppurationem expectare, quàm, illam maturè incidendo, puri aut humoribus in conchâ internâ nidulantibus viam facere? Sed, antequàm ad operationem Chirurgicam deveniatur, vapores saluberrimos injicere per tubam Eustachianam non dubitandum: nil periculi est: hæc animadvertas, velim, quæ quotidie accidunt, quoties nares emunguntur, ore licet aperto; dùm nares digitis stringuntur & musculi expiratorii aërem in narium cavos vibrant, ipsam etiam, eodem motu, per meatum Eustachianum in concham internam pellunt; sentis utramque tympani membranam fortiter pelli & distendi. Hæc sufficiunt, ut concludatur topica in concham auris internam injici posse, quamvis membrana tympani non perforetur.

*Ergò absque membrana tympani aperturâ topica injici in concham possunt.*

#### DOMINI DOCTORES DISPUTATURI.

<i>M. Petrus Chevalier.</i>	<i>M. Jacobus Verdelban des Moles.</i>	<i>M. Ludovicus - Petrus le Hoc.</i>
<i>M. Franciscus Bernard.</i>	<i>M. Claudius Perfon.</i>	<i>M. Antonius - Nicolaus Guenault.</i>
<i>M. Joannes le Thieullier.</i>	<i>M. Ludovicus - Renatus Desbois.</i>	<i>M. Paulus-Jacobus Malloin, Regiæ Scientiarum Academia Socius, Regiusque Librorum Chymicorum Censor, necnon utriusque Pharmacie Professor designatus.</i>

Proponebat Parisiis ALEXANDER-DIONYSIUS DIENERT,  
Meldenfis, Saluberrimæ Facultatis Medicinæ Parisiensis Baccalaureus,  
A. R. S. H. 1748, à sextâ ad meridiem.

---

Typis QUILLAU, Universitatis & Facultatis Medicinæ Typographi, 1748.